

三聽堂世譜原序

家之有譜也非獨以紀氏名昭世次蓋尊祖收族之道於是乎在焉人各有親親必有祖有數世之祖有百世之祖世愈遠則族愈繁而情誼亦愈疎故其始一人而已衍而爲五服析而爲九族久之而此五服九族之人又將一一各有其五服九族焉於是始於一人之身而馴至什伯其身千萬其身者自然之勢也夫千萬其身則亦且千萬其心而況族屬之遷處無常族人之榮枯互異寢疎寢隔其不相視如路人者幾何雖然千萬人之身其始一人之身也千萬人之心其始一人之心也試令人置一宗祖於其心人體一宗祖於其身則凡我族人孰非吾宗祖毛裏之遺而向之路人視者固將家人戚而一體屬矣宗黨安得不親睦乎風族安得不敦厚乎然使譜系不明則且不知其祖之所自出而又惡知其族之所自來其終於路人無怪也余伯鳴侯留心譜系考覈詳明嘗以修輯命余夫是以不揣固陋較閱舊譜而輯吾族之未登於譜者附焉集旣成而琴川之曾叔祖次

公適至且將合吾宗百有餘枝訂爲陸氏總譜而來徵譜於余余聞之而矍然起曰大矣哉是舉也不亦善乎諸譜合而子孫得按籍而指之曰某某吾同祖也某某吾同枝也某祖而後凡幾枝某枝之與吾同祖者凡幾世也而心不期而自親而誼不膠而自固則卽此百有餘枝之人已不啻藹如一家聯如一體矣況其在數世之內高曾以還五服之近九族之親而有不油然而生孝弟之思肫然切本支之愛者乎吾今乃知譜之爲益宏而爲教大也旣已言於吾宗於是遂退而書之以爲序

崑

康熙四十年仲冬朔日元侯七十一世孫鍾瑞韞玉謹述